

Ya'a tse'e je nak juu' ve'e je Pablo tyuknuja'yi je jaanchja'vivatajk jep Galacia

1 Atse'e je Pablo, ka je jáyuvap xa atse'e xvinkoon jets atse'e je kukátsiva n'ítut, ka je jáyuvapts atse'e ya toonk xtukkatajki, je Dios Tee' jets je Jesucristo, juu' ve'e je Dios Tee' yakjoojntypajknuva ku ve'e y'uk'aa'k, je'e tse'e viinm ats xvinkoondú jets atse'e je kukátsiva n'ítut. ²Ats jets nujom je utsta je ajchta jets je utsta je tsa'áda juu' ve'e ats maat, máyam aatse'e je Dios ntuknúkexta nujom je jaanchja'vivatajk pan pan jatye'e nay'amojkijidup jem galáciait y'it jootm. ³Je Nte'yam, juu' ve'e nTeel'imdú, jets je Maja Vintsán Jesucristo, je'eda tse'e mkunoo'kxjadap jetse'e m'ijttinit je y'oy joot maatta, ⁴je Jesucristo, juu' ve'e xku'oo'kimdu je ntokin kajxamda jetse'e ve'em xtuknuvaatsumdinit ya ko'oy tiempo juu' ve'e nyaknajxumdup. Ve'em tse'e dütujn ax jo'n dutsak je nNte'yamamda, juu' ve'e nTeel'imdú. ⁵iXa'ma kajx tse'e je Nte'yam dunumájininit dunujaanchinit! Amén.

**Ka'a xa ve'e ti jado'k
oy kats oy ayook**

⁶Atuva atoki xa atse'e xyaktanda ku ve'e je Nte'yam tun jatyi

xmasookti jetse'e xpanajkxta je viijnk ixpajkun juu' ve'e je jayu tyijitup oy kats oy ayook, je Nte'yam, juu' ve'e myaaxuxjudu je Cristo je myaa'yun kajx. ⁷Ka'a xa ve'e jyeja je viijnk oy kats oy ayook, je'e ve'e ku ve'e jem je jayu juu' ve'e myakvinmamyatjudup jetse'e duyaktikutsuva'anda je oy kats je oy ayook. ⁸Ax jya'átsam, ukpu jya'aangelesam juu' ve'e jem tsapjootm kukyada'aky, pan kumyaktuk'ixta xa ve'e je kats je ayook juu' ve'e kyapaatyp kyah'akeeguij maat je oy kats je oy ayook juu' ats miitse'e ntuk'ixtu, ko'oy nukótsats je'e ve'e y'ijtnit. ⁹Ta xa atse'e nva'añ, vaannuvapts atse'e jado'k nax, pan jem xa ve'e juu' ve'e mtuk'ixjudup je kats je ayook juu' ve'e kyapaatyp kyah'akeeguij maat je oy kats je oy ayook juu' ve'e mkuvajktu, ko'oy nukótsats je'e ve'e y'ijtnit.

¹⁰¿Juu'ts atse'e ntsajkp ku atse'e ve'em nva'añ, ku atse'e je jayu x'oyjávát, ukpu ku atse'e je Nte'yam x'oyjávát, ku atse'e jeja je jayu vyinkujk oy ntánut, ukpu ku atse'e

jeja je Nte'yam vyinkujk oy ntánut? Pan kuntsak xa atse'e jets atse'e jeja je jayu vyinkujk oy ntánut, ka je Jesucristovaps atse'e ntoojnip.

Je Jesucristo ve'e d̄vinkoon je Pablo jetse'e y'ítut je kyukátsiva

¹¹Ax nujávadats ya'a, utsta ajchta utsta tsá'ada, je oy kats je oy ayook juu' ats miitse'e nvaajn̄jidu, ka je jáyuvaps je'e ve'e je v̄yinma'yun, ¹²ka je jáyuvaps ats je'e ve'e xtukkatajki, ka je jáyuvaps ats je'e ve'e xtukyak'ixpajk, je Jesucristo, je'e xa ve'e viinm ats xtuk'ix xtuknuja'vi.

¹³Mmótudu xa ve'e je kats vintso atse'e njáyuva y'ij̄t ku atse'e njaanchjáva y'ij̄t juu' ve'e jyaanchja'vidup ats je nmu'israeejlit jayu, jets vinxup atse'e nmu'ejkji pan pan jatye'e je Cristo dujaanchja'vidup, jets ats je'e ve'e njomtoondi ntitoondi jets atse'e ntukmaso'oktat juu' ve'e jyaanchja'vidup. ¹⁴Nuyojk xa atse'e nkutyún y'ij̄t juu' ve'e je israeejlit jayu jyaanchja'vidup jets ni ka'a ve'e numay ats je njayu juu' atse'e nmu'akijpxada, nuyojk atse'e nkutyún y'ij̄t aats je njujpit jayu je pyava'nunda jets ni ka'a ve'e je'eda. ¹⁵Ax je maja maa'yunts atse'e je Nte'yam xtoojnji jets atse'e xvinkaajn ka'anum atse'e nke'ex vye'na. Ve'em tse'e d̄utuujn jets atse'e je kukátsiva n'ítut. ¹⁶Ax ku tse'e d̄u'oyja'vi, van'itts atse'e xtuk'ix je y'Onuk, ve'emts atse'e je jayu nvaajn̄jadat je oy kats je oy ayook pan pan jatye'e ka je israeejlit jáyuvap. Ku ve'e ve'em jyajty, ni pánats atse'e juu'

nkah'amotutuv̄i jets atse'e nujávát ti atse'e ntónup, ¹⁷ni ka'ats atse'e jem Jerusalén nmajkxpa jets atse'e n'íxtat pan pan jatye'e too'vajkp ij̄ttu je kukátsivada jets ka'a ve'e ats, ñojk'óy atse'e tun jatyi nuujkx jem arábaiat y'it jootm, ux'looks atse'e nvimpij̄tnuva jem Damasco.

¹⁸Kutoojk joojntnumts atse'e n'ats jem Jerusalén jets atse'e je Pedro nmaatnakyojtsji; ax je'e maatts atse'e n'ij̄t makmoxk xaaj. ¹⁹Ax ka'ats atse'e jado'k je kukátsiva n'ix, je Santiágoji ve'e, je Maja Vintsán je y'uts. ²⁰Yájats atse'e nva'añ je Nte'yam vyinkujk jets tyúvam ya'a ve'e juu' ats miitse'e ntuknuja'vidup. ²¹Van'itts atse'e nuujkx jem siiriat jets cilíciat y'it jootmda. ²²Ka'ats atse'e x'íxada y'ij̄t pan pan jatye'e to'k muk ij̄ttup je Cristo maat jetse'e ñay'amókajada jem judéait y'it jootm, ²³je'ejyji ve'e y'amotunajxtup y'ij̄t: "Je'e pane'e xjomto'numdup xtito'numdup y'ij̄t, je'e tse'e uxyam je jayu d̄uvaajn̄jip jetse'e dujaanchjávadat je Jesucristo, ka'a tse'e d̄u'uktsoj̄kni jetse'e dujaanchja'vi'atúvadat je Jesús." ²⁴Ax ve'em tse'e d̄uyakmájidi d̄uyakjaanchidi je Nte'yam je maja maa'yun kajx juu' atse'e xtoojnji.

Ku je viijnk kukátsiva dukuvajkti je Pablo

2 Kumakmajkts joojntnumts atse'e nnajkxnuva jem Jerusalén, nmaadi atse'e je Bernabé, nvoovts atse'e je Tito. ²Oj̄tsts atse'e jem kux je Nte'yam atse'e xtuk'ix xtuknuja'vi. Ku aatse'e jem Jerusalén nve'na, van'itts aatse'e juu' nkoj̄tsmúk apuk maat je'eda

pan pan jatye'e dunumájidup. Jemts atse'e n'ava'ni je oy kats je oy ayook, ve'em ax jo'n atse'e uxyam paat nvaajnjada je'eda pan pan jatye'e ka je israeejlit jáyuvap. Ve'emts atse'e ntuujn kux je'e atse'e ntsajkp jetse'e kyavintókiyut juu' atse'e ntoon jets juu' atse'e ntuumpna. ³Ax óyam tse'e kya'israeejlitjáyuva je Tito, ka'a tse'e dutuk'akee'yidi jetse'e je ixta'nun yakpaajmjat jetse'e duni'kxmat dukojmat. ⁴Ax jem tse'e pan pan jatye'e natyijjudup utsta ajchta, je'e tse'e du'uktsojktu jetse'e je Tito kuyakpaajmji je ixta'nun. Je'e kajxts je'e ve'e ñay'amokijidi aats maat je ixpookpa jo'nda, jetse'e du'íxtat joma vaate'e juu' yakkuvuk ku ve'e je jayu y'it to'k muk je Jesucristo maat, y'uktsojktuts je'e ve'e jets aatse'e kux'akee'yidi jets aatse'e mpanajkxnuvat je Moisés je pyava'nun. ⁵Ax ni vinxúpat aatse'e nkanamyasookji jets aatse'e ntónut juu' ve'e y'uktsojktu, kux je'e aatse'e ntsajkp jetse'e xjaa'kjayéptat je tyuv je'e, ve'em ax jo'n y'íxuva je oy kats je oy ayook.

⁶Ka'ats atse'e je viijnk kojtsvíjin xmooydi je'e pan pan jatye'e yakkojtstup jets ñumájidup je'e ve'e. Ax ka'ats ats je'e ve'e ntoonka pan ti je'e ve'e y'ijtti, kux ka'a ve'e je Nte'yam duyakvinkopka vinxupe'e je majin dujayepa to'k jado'k. ⁷Kyuvajktuts je'e ve'eda jets atse'e je Nte'yam xtukkatajki je toonk jets atse'e nvaajnjadat je oy kats je oy ayook pan pan jatye'e ka je israeejlit jáyuvap, ve'em ax jo'n je Nte'yam je Pedro dutukkatajki je toonk jetse'e duvaajnjadat nay je'ejam je oy

kats je oy ayook pan pan jatye'e israeejlit jayu. ⁸Je Nte'yam, juu' ve'e je Pedro duputajki jetse'e dutónut je kukátsiva toonk joma ve'e je israeejlit jayu, je'ejamts je'e ve'e juu' atse'e xputajkiva jets atse'e ntónut je kukátsiva toonk joma ve'e ka je israeejlit jáyuvap.

⁹Ax je Santiago maat je Pedro jets je Juan, je'e juu' ve'e yakkojtstup jets ñumájidup je'e ve'e, ku ve'e dunuja'vidi jets je Nte'yam atse'e ya toonk xmooy je myaa'yun kajx, van'litts aatse'e xkavaa'ndi, ats maat je Bernabé, ve'em tse'e duyaknuke'xnatajkidi juu' aatse'e tunkojtsmúk, ve'em tse'e vyaandi jets ntukmaatjajejptup aatse'e ya toonk je'e maatta. Oy tse'e dujávada jets aatse'e najkx njaa'ktún joma ve'e ka je israeejlit jáyuvap jets je'e ve'e jyaa'któndat joma ve'e je israeejlit jayu.

¹⁰Je'ejyits aatse'e x'amótudu jets aatse'e njaa'myétsut je ayooova jáyuda. Je'emts atse'e ntuump vye'na jets atse'e ntunyakvinkopka jets atse'e njaa'któnut.

Ku je Pablo duintso'y je Pedro jep Antioquía

¹¹Ax ku tse'e je Pedro jye'y jem Antioquía, ntuknuujmits ats je'e ve'e aviinm ah'am kux tokin je'e ve'e juu' ve'e tyoon. ¹²Myaatkaayp myaat'uukp tse'e vye'na je utsta je ajchta pan pan jatye'e ka je israeejlit jáyuvap, ax ku tse'e jye'ydi je utsta je ajchta juu' ve'e tsoo'ndu jem joma ve'e je Santiago, van'it tse'e mejts'aaj mejtsjoot je Pedro apuk ñayaaajmji jetse'e dukoo'kmaatkaayni

dukoo'kmaat'ookni. Je'e kajx tse'e ve'em jyatki kux cha'kipe'e pan pan jatye'e vaandup jets ixta'numpuujmja ve'e dutsak je utsta je ajchta pan pan jatye'e ka je israeejlit jáyuvapta. ¹³Van'it tse'e je viijnk israeejlit jayu juu' ve'e dujaanchja'vidup je Jesucristo, je'e tse'e je mejts'aaj je mejtsjoot dujayejptu maat je Pedro, je Bernabé paat tse'e ve'em jyátkiva. ¹⁴Ax kuts atse'e n'ix jets ka'a ve'e dupaa'ty du'akeega juu' ve'e tyoondup maat je tyuv je'e, ve'em ax jo'n y'ixuva je oy kats je oy ayook, van'itts atse'e jeja je numay jayu vyinkujk ntuknuujmi je Pedro. Jidu'umts atse'e nvaajñ: "Mits, óyam mitse'e mja'israeejlitjáyuva, ve'em xa mitse'e mjoojntyka ax jo'n pan pan jatye'e ka je'lepta, ka ve'emape'e ax jo'n je israeejlit jayu. ¿Tyajx tse'e x'akee'yava'añ juu' ve'e ka je israeejlit jáyuvapta, jetse'e dukutyóndat je israeejlit jayu je pyava'nunda? ¹⁵Je ke'xtkun kajx xa uu'me'e n'israeejlitjáyuvimda, ka'ats uu'me'e nyaktíjumba tókinax jayu, ve'em ax jo'n pan pan jatye'e ka je israeejlit jáyuvap. ¹⁶Nnuja'vimdinuupts uu'me'e jets ka'a ve'e je Nte'yam je jayu dukatokimpum je Moisés je pyava'nun kajx, je'e ve'e ku ve'e je Jesucristo yakjaanchjáva. Je'e kajx tse'e je Jesucristo njaanchja'vimda jetse'e je Nte'yam xkatokimpa'mumdat, ka'a tse'e n'ixtimda vintso ve'e nkutyo'numdat je Moisés je pyava'nun jets je'e kajxe'e je Nte'yam xkatokimpa'mumdat, kux je Nte'yam, tyumtókimpuum je'e

ve'e je jayu je Moisés je pyava'nun kajx."

¹⁷Pan n'ixtimdup tse'e jetse'e je Nte'yam xkatokimpa'mumdat kuxe'e to'k muk n'ijtumda je Cristo maat, yaknuke'xnatajkipts je'e ve'e jets tókinax jayu uu'me'eda. ¿Yaktíjupts je'e vine'e jets uu'me'e je Cristo xyaktokinto'numdup? iNi vintsova xa ve'e ve'em kyayaktij! ¹⁸Ax pan ats tse'e je jayu kuntuk'ix jetse'e dukutyóndat je pava'nun juu' atse'e uxyam je jayu nvaajnjidup jets ka je'e kajxape'e je jayu yaktokinmee'kx, kunyaknuke'xnatakáts atse'e jets tokin maat atse'e je'e kajx ku atse'e nkakutyún je pava'nun. ¹⁹Ve'em xa atse'e ax jo'n atse'e aa'k kun'ijt jeja je Moisés je pyava'nun vyinkujk, je pava'nun juu' atse'e xtuk'ix jets nvinmajtsjup atse'e je oo'kun kuxe'e ats nkakutyuujn. Je pava'nunti atse'e ve'em xyaktaan jets atse'e njoojntykat vintso ve'e je Nte'yam yakmaja yakjaancha y'ijtnit. ²⁰Ve'em xa atse'e ax jo'n atse'e kun'aa'k jem cruz kajxm je Cristo maat. Je'e kajxts atse'e nko'o'kjoojntykini jets atse'e nyaktónut ya n'avintso vinma'yun, je Cristo ve'e joojntykip yam ats nja'vin kajxm, jets namvaat atse'e ya naxviijnit ni'kxukopk njayep, je Nte'yam je y'Onuk kajxts atse'e njoojntyka kuxe'e ats je'e njaanchjáva, je'e juu' atse'e ooy xtunsojpk jets atse'e xku'oo'ki. ²¹Ka'a xa atse'e nkakuvuk je maa'yun juu' ve'e je Nte'yam xtoojnjimdup je Cristo kajx. Kux pan je Nte'yam xa ve'e je jayu kudukatokimpum je Moisés je

pyava'nun kajx, ve'emts je'e ve'e
ax jo'n kúkyatih'ijit ku ve'e je Cristo
y'luk'aa'k.

Je pava'nun jets je jaanchja'vin

3 Miits, galáciait jáyuda, ka'a
ve'e oy juu' xpayo'oyda.
¿Pane'e mko'oyvin'íxjudu jets'e
xkoo'kjaanchja'vidini je tyuv je'e?
Va'ajts xa ats miitse'e nvaajnjidi
jetse'e xnuja'vidi vintso ve'e je
Cristo duyakruuzpejtti, ve'em
ax jo'n viinm kux'ixti jo'n. ²To'k
viijnji atse'e nnujavava'añ jets'e
xnukótstat, ¿mkutyoondú vine'e
je Moisés je pyava'nun jets je'e
kajxe'e je Espíritu Santo tyajki jem
mja'vin kajxmda, ukpu je'e kajxe'e
kuxe'e xjaanchja'vidi je oy kats je
oy ayook juu' ve'e m'amotunajxtu?
³¿Vintso ve'e m'o'yixjada jets'e
mnapyámjada va'ajts ka víjap?
Mton'ukvaandu xa ve'e juu' ve'e je
Nte'yam chajkp kuxe'e je Espíritu
Santo mputajkijidi. ¿Ve'eme'e
uxyam xtsokta jets'e m'íttat oy
jets va'ajts je m'avintso kutojkun
kajxta? ⁴¿Ka'a vine'e mto'nuxjada
ni vinxupa nujom je tsaachpaatun
juu' ve'e myaknajxtu? iÓyap ijk
je'e vine'e mto'nuxjada! ⁵Ku ve'e
je Nte'yam dukejx je Espíritu Santo
jetse'e y'ítut jem mja'vin kajxmda
jetse'e je Nte'yam dutún je majin
joma ve'e miitsta, ¿ti kajxts je'e ve'e
ve'em dutún? ¿Je'e kajx vine'e ku
ve'e x'íxtada vintso ve'e xkutyóndat
je Moisés je pyava'nun, ukpu je'e
kajx vine'e ku ve'e xjaanchjávada
je oy kats je oy ayook juu' ve'e
m'amotunajxtu?

⁶Jyaanchja'vits je'e ve'e
je Abraham je Nte'yam. Ax kux

tse'e dujaanchja'vi, je'e kajx tse'e
je Nte'yam kyatokimpaaajmji.

⁷Ax ve'em tse'e, nujávada tse'e
jets je'eda pan pan jatye'e
dujaanchja'vidup je Nte'yam, je
jaanchja'vin kajxts je'e ve'e y'ítta je
Abraham je chaanda je kyoojta. ⁸Ku
ve'e kyatúnjuna vye'na, y'ava'nits
je'e ve'e je Kunuu'kx Jatyán jets
je jaanchja'vin kajxe'e je Nte'yam
dukatokimpámút pan pan jatye'e ka
je israeejlit jáyuvap, tyukmukojs
tse'e je Nte'yam je Abraham
jujpani je oy kats je oy ayook ku
ve'e dunuu'jmi: “Mits kajx xa ve'e
dupaa'ttat je kunoo'kxun je jayu
pan nuvinxupe'e chaanada to'k
it to'k naxviijn.” ⁹Ax ve'em tse'e,
je'eda pan pan jatye'e je Nte'yam
dujaanchja'vidup, kunoo'kxjudupts
je'e ve'e je Nte'yam, ve'em ax jo'n
dukunuu'kx je Abraham, juu' ve'e
jaanchja'viju.

¹⁰Nujom tse'e pan pan jatye'e
dumákkip je Moisés je pyava'nun,
ko'oy nukotsa tse'e y'ítta, kux
jidu'um xa ve'e je Kunuu'kx
Jatyán vya'añ: “Ko'oy nukotsa
tse'e y'ítta to'k ka'ajyji pan pan
jatye'e dukakutyoondup nujom juu'
jatye'e javyet yap pava'nun kujxp.”
Jidu'um tse'e vya'añ. ¹¹Va'ajts
tse'e yaknujava jets ka'a ve'e pan
pane'e je Nte'yam kyatokimpuump
je Moisés je pyava'nun kajx,
kux jidu'um xa ve'e vyaampa
je Kunuu'kx Jatyán: “Pan pan xa
ve'e je Nte'yam kyatokimpuump
je'e kajx ku ve'e jyaanchjávaja,
joojntykaps je'e ve'e.” Jidu'um tse'e
vya'añ. ¹²Pan kudukutyún xa ve'e je
jayu je Moisés je pyava'nun, o'yipts
je'e ve'e jetse'e ve'em dukutyóndat

óyame'e dukajaanchjávada je Nte'yam. Ve'em xa je'e ve'e ax jo'n je Kunuu'kx Jatyán vya'añ: "Pan pan xa ve'e dukutyoomp nujom je pava'nun, joojntykaps je'e ve'e."

¹³Ax ve'em tse'e, ko'oy nukotsa tse'e n'ijtumdi kuxe'e nkakutyo'numdi je Moisés je pyava'nun. Ax ka'a tse'e uxyam n'uk'ijtumdini ko'oy nukotsa, je Cristo ve'e xtuknuvaatumdu je ntókinamda, je'e tse'e ko'oy nukotsa ijt uu'm kajxamda ku ve'e xku'oo'kimdi, ve'em ax jo'n je Kunuu'kx Jatyán vya'añ: "Ko'oy nukotsa xa ve'e nujom pan pan jatye'e jem kup kajxm oo'ktup." Jidu'um tse'e vya'añ.

¹⁴Xtuknuvaatumdu tse'e je ntókinamda, ax ve'em tse'e je Cristo kajx je Nte'yam dukunoo'kxut pan pan jatye'e ka je israeelit jáyuvap, ve'em ax jo'n je Abraham yakkunuu'kx, xku'oo'kimdu ve'e jetse'e to'k ka'ajyji je jaanchja'vin kajx njayejpumdinit yam nja'vin kajxmamda je Espíritu Santo, juu' ve'e je Nte'yam vyaajntk jetse'e myiinnit yaja naxviijn.

Je pava'nun jets je vaanduk

¹⁵Utsta ajchta utsta tsa'ada, jidu'um xa ve'e je jayu yuj dujayepta yaja naxviijn. Ku xa ve'e je jayu to'k je nak duyak'óyada pan vintso ve'e juu' dukojts'óyada, ni pana tse'e kya'o'yixju jetse'e duyakpuva'atsut ukpu duyaknujókat. ¹⁶Nay ve'em tse'e jyajtpa ku ve'e je Nte'yam je vaanduk duyaktaajñ maat je Abraham jets je chaan je kyooj. Ka'a tse'e je Kunuu'kx

Jatyán vya'añ jets je Nte'yame'e je Abraham dunuujmi: "je mtsaanda je mkoojta", ve'em ax jo'n numay je tsaan je kooj kuy'ijtti; jidu'lume'e dunuujmi: "je mtsaan je mkooj". Ax je'ets ya'a ve'e tyijp to'kji je chaan je kyooj, je'ets je'e ve'e je Cristo. ¹⁷Ya'a xa atse'e ntijp. Ku ve'e je Nte'yam dumukajts je Abraham, tyukvinva'nits je'e ve'e jets kyutyónupe'e je y'ayook. Je'e kajx tse'e je Moisés je pyava'nun juu' ve'e maktaaxk mókupx ja'i'ipx majk joojnt ux'ook je'y, ka'ats je'e ve'e y'o'yixju jetse'e dununkayakjátut jetse'e tyónjut kyótsjut je ayook juu' ve'e je Nte'yam je Abraham tyukvinva'ni. ¹⁸Ax pan van'itji tse'e je Nte'yam kudukutyún je y'ayook ku ve'e je jayu dukutyún je Moisés je pyava'nun, ka'a tse'e tyun je ayook juu' ve'e je Nte'yam je Abraham tyukvinva'ni jets tyónupe'e je myaa'yun kajx.

¹⁹Ax ve'em tse'e, ítits je'e ve'e vya'añ je Moisés je pyava'nun? Yakmooy xa ve'e je Moisés je pava'nun jetse'e ve'em je jayu je tyokin yaknuke'xnatáka y'ítut, távani ve'e je Nte'yam je vaanduk duyaktáñ vye'na je Abraham maat. Je vaat xa ve'e jyejk je pava'nun ku ve'e myiijn je Abraham je chaan je kyooj, je'e pane'e je Nte'yam vyaajntk jetse'e myínut. Je ángeles kajxta xa ve'e je Moisés yakmooy je pava'nun, van'it tse'e je Moisés je pava'nun dukojtsaajxy je ja jayu vyinkujkta. ²⁰Ax viinm tse'e je Nte'yam je kojstán duyaktaajñ je Abraham maat, ka'a tse'e pan viijnk yaktsajk juu' ve'e je Abraham kudunuujmi vintso ve'e je Nte'yam vyaajñ.

**Juu' ve'e je Moisés
je pyava'nun tyuump**

²¹ ¿Je'ets ya'a vine'e tyiijp jets cho'oxpujke'e je Moisés je pyava'nun je Nte'yam je vyaanduk? iNi vintsova xa ve'e ve'em kyayaktij! Kux pan jeja xa ve'e kuy'it je pava'nun juu' kajxe'e je Nte'yam duyaky je joojntykin juu' ve'e xa'ma kajx ijtp, je pava'nun kajx tse'e je Nte'yam je jayu kudukatokimpum. ²² Ax vaamp xa ve'e je Kunuu'kx Jatyán jets to'k ka'ajyji ve'e je jayu y'itta jem je tokin kya'm. Je'e kajx xa ya'a ve'e ve'em jetse'e je jaanchja'vin kajx yakmooydinit je Nte'yam je vyaanduk je'eda pan pan jatye'e je Jesucristo dujaanchja'vidup.

²³ Ka'anume'e je Jesús myin vye'na yaja naxviijn, ijtumdu tse'e jep je Moisés pyava'nun pa'tkup. Ve'em tse'e n'ijtumdi van'it paat ku ve'e je jayu yakvaajnji'ukvaandi vintso je'e ve'e ku ve'e je Jesucristo yakjaanchjáva. ²⁴ Ax ve'em tse'e je Moisés je pyava'nun xka'mimda y'ijit ax jo'n je pi'k ónuk kun'ijtumdi, xtuk'íxumdu tse'e pan ti je'e ve'e je tokin. Ve'em tse'e dutuujn van'it paat ku ve'e je Cristo myiijn jetse'e je jaanchja'vin kajx je Nte'yam xkatokimpa'mumdat. ²⁵ Ax uxyam tse'e, ku ve'e njaanchja'vimda je Cristo, ka'a tse'e n'uk'ijtumdini jep je Moisés pyava'nun pa'tkup.

²⁶ Kuxe'e je Jesucristo xjaanchjávada, je'e kajx tse'e m'itta je Nte'yam je y'ónuk. ²⁷ Nuvinxupts miitse'e m'itta to'k muk je Cristo maat je napejtun kajx, ve'em xa ve'e m'itta ax jo'n je Cristo

kumnatyukxojxjidi jo'n. ²⁸ Ka'a xa ve'e vyinkopka pan je jayu ve'e y'it israeejlit jayu uk pan pan jatye'e ka je'epta, joyutoompa jayu ukpu naspaka jayu, yaa'tyajk ukpu ta'axtajk, kux ku xa ve'e to'k muk n'ijtumda je Cristo Jesús maat, ve'em tse'e nujom n'ijtumda ax jo'n to'k ni'kx to'k kopk kun'ijtumdi. ²⁹ Ax pan ve'em tse'e n'ijtumda je Cristo maat, je Abraham je chaan je kyoojts uu'me'eda, xtukkadaakumdupts uu'me'e je vaanduk juu' ve'e je Nte'yam yaktaan.

4 Ya'a xa je'e ve'e juu' atse'e ntijp: Namvaat xa ve'e je jayu je y'ónuk pi'knum juu' ve'e je puk tukkada'akjup, óyame'e je puk duje'eikáxut nujom, vanxupts je'e ve'e y'it ax jo'n je joyutoompa. ² Jem xa ve'e je jayu juu' ve'e íxjudup jetse'e kya'majada van'it paat ku ve'e jye'yat je xaa' juu' ve'e je tyee' ñupaajmtki. ³ Ve'lemts uu'me'e njajtumduva. Namvaat xa ve'e n'ijtumdi ax jo'n je pi'k ónuk, ooy tse'e ntuntsojkumdi jetse'e mpanajkxumdat je ko'oy costumbre juu' ve'e je jayu pyanajkxtup yaja naxviijn. ⁴ Ax ku tse'e je xaa' jye'yni juu' ve'e je Nte'yam ñupaajmtki, van'it tse'e je Nte'yam dukejx je y'Onuk, je ta'axtajkts je'e ve'e yakke'xju, jetse'e y'ijit jep je Moisés pyava'nun pa'tkup. ⁵ Ve'em tse'e dutuujn jetse'e xpajkumpijtumdinuvat, ka'a tse'e n'uk'ijtumdinit jep je Moisés pyava'nun pa'tkup, je'e ve'e jetse'e n'ijtumdinit je Nte'yam maat ax jo'n je'e je y'ónuk.

⁶ Kux je Nte'yam je y'ónuk miitse'eda, je'e kajx tse'e je Nte'yam

dupuujm jem mja'vin kajxmda je Espíritu Santo, juu' ve'e ijtpap jem je Nte'yam jya'vin kajxm, je Espíritu Santo, juu' kajxe'e je Nte'yam nmukojtsumda jidu'um: "Tata, aats je nTee!" ⁷ Ax ve'em tse'e, je Nte'yam je y'ónuk xa miitse'eda, ka'a tse'e m'uk'ijttini ax jo'n je joyutoompa. Ax je'e tse'e kuxe'e m'itta je Nte'yam je y'ónuk, je'e kajx tse'e je Cristo kajx mmoojyjidinit nujom je y'oy je'e juu' ve'e mtukkada'akjadap kux je'e je y'ónuk miitse'eda.

Ku je Pablo dvinmaajy je jaanchja'vivatajk jep Galacia

⁸Ku miitse'e je Nte'yam xka'ixadana vye'na, mmutoonduts miitse'e may juu' ve'e ka je Nte'yamap. ⁹Ax uxyam tse'e, je'e ve'e kuxe'e je Nte'yam x'ixaidini, ukpu ñojk'óy yakkats, je'e ve'e kuxe'e je Nte'yam m'ixaijidini, évintsose'e mnayjávajada jetse'e jado'k nax x'avimpijtadinuva jetse'e mka'mijidinuva je costumbre juu' ve'e katoomp jets tukma'atum? ¹⁰iJem tse'e je xaaj, je po'ó, je aats, jets je joojnt juu' ve'e m'amaa'yidup! ¹¹Je'ets atse'e nvinmaayp ku ve'e ni vinxupa mkato'nuxjadat juu' ats miitse'e ntuk'ixtu.

¹²Utsta ajchta utsta tsa'ada, nmunoo'kxktup xa ve'e jetse'e mnapyámjadat ats maat, ve'em ax jo'n atse'e nnapyujmju miits maatta. Ka'a xa ats miitse'e xmutokintoondi. ¹³Ax jo'n xnujávada jo'n, je pa'am kajx atse'e muto'k nax n'ijit miits maatta jetse'e nvaajnidi je oy kats je oy ayook.

¹⁴Oyam tse'e mtso'oxajtuxjidi ku atse'e pajkjud nve'na van'it, ka'ats ats miitse'e xviijn'íxti, ni ka'ats atse'e xko'oyja'vidi, ñojk'óy atse'e xkuvajkti ax jo'n atse'e kun'ijit je Nte'yam je yaangeles ukpu atse'e kun'ijit je Jesucristo viinm. ¹⁵¿Jómase'e y'it je xoojntkun juu' ve'e mjajejptu van'it? Ve'em xa ats miitse'e nnaajmada jets pan kum'o'yixjidi ve'e jets atse'e xyakjotkadaakti, je mviijn paat tse'e kuxyakpítsumdi jets atse'e kuxmooydi. ¹⁶Ax uxyam, ¿je mtso'oxpajkpada ats vine'e tunvimpijtni je'e kajx ku ats miitse'e nvaajnidi je tyuv je'e?

¹⁷Ooy xa miitse'e mtunvinmáyjada je'eda pan pan jatye'e duyaktikutsuvaandup je oy kats je oy ayook; ax je kyo'oy je'ets je'e ve'e juu' ve'e mtukmutsojkdudup. Je'ets je'e ve'e chojktup jets ats miitse'e xmasooktinit jets je'e ve'e xpanajxtinit. ¹⁸Oy xa je'e ve'e ku ve'e je jayu je viijnk jayu dvinmay pan oy je'e ve'e juu' ve'e yaktukmutsojktup. Xa'ma kajx tse'e ve'em yaktónut, ka van'ítjyap ku atse'e n'it miits maatta. ¹⁹Miits, juu' atse'e n'onukja'vidup, jado'k nax xa atse'e je tsaachpaatun nyaknaxy miits kajxta, ve'em ax jo'n je ónuk taak je tsaachpaatun duyaknaxy ku ve'e je y'ónuk duyakke'exuva'añ. Ax jaa'ktsaachpaa'tuups atse'e van'it paat ku ve'e m'ijttini ax jo'n je Cristo dutsak. ²⁰Ooy atse'e njatuntsak jets atse'e uxyam kun'it miits maatta, ve'emts atse'e kunyaknukexnatáka jets ooy ats miitse'e ntuntsokta. Ooy ats miitse'e xtunvinma'yunmo'oda.

Jē Agar jēts jē Sara tukmu'a'ixmojkin

²¹Miitsta, pan pan jatye'e jep jē Moisés pyava'nun pa'tkup napyamuvaajjudup, nukótstats n'it, čka'ana miitse'e x'amotunaxta vintso ve'e vya'añ jē pava'nun? ²²Ve'em xa ve'e vya'añ jēts nūmejtske'e jē y'ónuk y'ijt jē Abraham, to'k juu' ve'e tyukmaatjayejp jē jajtspa jēts jado'k juu' ve'e tyukmaatjayejp jē nūda'axam. ²³Jē jajtspa, jē Agar, ve'emts jē'e ve'e jē y'ónuk kye'x áxam jo'n opyán pi'k ónuka. Ax jē Abraham jē nūda'ax, jē'e tse'e to'k jē pi'k ónuk duyakke'x jēts'e ve'em tyónjut juu' ve'e jē Nte'yam jē Abraham tukvinva'niju. ²⁴Ya nūmejtsk ta'axtajkta, mejtsk jē kojstánt's jē'e ve'e juu' ve'e yaktukmu'a'ixmojkidup. To'k jē kojstán, jē'e juu' ve'e jē jayu yakmooydu joma ve'e jē Sináí Kopk, jē Agaarts jē'e ve'e jē kojstán yaktukmu'a'ixmojkip. Pan pan jatye'e jep kojstánupa'tkup ijttup, jēpts jē'e ve'e pava'nun pa'tkup y'litta. ²⁵Jē Agar, juu' ve'e yaktukmu'a'ixmojkip jē kojstán juu' ve'e jē jayu yakmooydu joma ve'e jē Sináí Kopk juu' ve'e jem arábaiat y'lit jootm, ve'em xa jē'e ve'e ax jo'n jē jáyuda juu' ve'e uxyam tsuunidup jem Jerusalén, jē'e tse'e ijttup ax jo'n jē joyutoompada, nay ve'empa tse'e pan pan jatye'e napyajmjudup jep pava'nun pa'tkup jē'e maatta. ²⁶Ax jē tsapjootmit Jerusalén, ka'ats jē'e ve'e vye'ema ax jo'n jē joyutoompada, ve'em jē'e ve'e ax jo'n uu'me'e kuntaakimdi. ²⁷Kux jidu'ume'e vya'añ jē Kunuu'kx Jatyán:

Xoon xa mitse'e, ta'axtajk juu' ve'e jē y'ónuk dukayakjéjp, juu' ve'e jē ónuk dukajayejp jēts'e dukanujava jē tsaachpaatun ku ve'e jē ta'axtajk jē y'ónuk duyakjeja, kotsu tse'e makk jē mxoojntkun kajx, kux jē ta'axtajk juu' ve'e yakmasook, jaa'kjéjaps jē'e ve'e jē y'ónuk nuyojk jēts ka'a ve'e jē'e juu' ve'e jem jē nūyaa'y.

Jidu'um tse'e vya'añ.

²⁸Utsta ajchta utsta tsa'ada, jē Abraham jē y'ónuk jē'e ve'e jē Isaac jē'e kajx ku ve'e jē Nte'yam tyukvinva'niji, nay ve'empa tse'e n'ijtumda jē Nte'yam jē y'ónukta jē Nte'yam jē vyaanduk kajx. ²⁹Ax ve'em tse'e, ve'em ax jo'n van'it jyajty ku ve'e jē ónuk juu' ve'e ke'x ax jo'n jē pi'k ónuk kye'exta, jē'e tse'e dujomtoon dutitooon jē ónuk juu' ve'e ke'x jē Espiritu Santo jē myakkin kajx, nay ve'empa tse'e uxyam jyajtpa. ³⁰¿Ax vintso tse'e vya'añ jē Kunuu'kx Jatyán? Vaamp xa ve'e jidu'um: "Pavojpni jē jajtspa maat jē y'ónuk, kux ka'a ve'e jē jajtspa jē y'ónuk dutukmaatjayéput jē puk jē ónuk juu' ve'e jē tyaak jem jē nūyaa'y." ³¹Ax ve'em tse'e, utsta ajchta utsta tsa'ada, ka'a xa uu'me'e nve'emamda ax jo'n jē jajtspa jē y'ónuk, ve'em uu'me'eda ax jo'n jē ónuk juu' ve'e jē tyaak jem jē nūyaa'y.

"Naajk'ítjada naspaka"

5 Jē Cristo xa ve'e xyakta'numdup naspaka. Ve'em tse'e dutuujn jēts'e

nkoo'k'ijtumdinit ax jo'n je joyutoompada. Naajk'ítjada naspaka, ka'a tse'e m'uknapyaajmjidinuvas jep kutojkun pa'tkup juu' ve'e myaktaajnjidinuvas ax jo'n je joyutoompa kum'ijtti.

²Amotunaxta. A'ts, je Pablo, vaamp xa atse'e jets pan myakpaajmjidupe'e je ixta'nun jetse'e xni'kxmadat xkojmadat, ni vinxúpats je'e ve'e mkato'nuxjadat juu' ve'e je Cristo tyoon.

³Nnuujmidinuvas xa ats miitse'e jado'k nax: Pan pan jatye'e je ixta'nun yakpaajmjidup jetse'e duni'kxmadat dukojmadat, tun vinkopkts je'e ve'e jetse'e dukutyóndat nujom je Moisés je pyava'nun. ⁴Miitsta, pan nuvinxupe'e x'íxtada vintso ve'e je Nte'yam mkatokimpámjadat kuxe'e xpanajkxta je Moisés je pyava'nun, apuk tse'e mnapyámjada ka je Cristo maatap, mnapyaaajmjidup tse'e joma ve'e mkapaa'tjadat je Nte'yam je myaa'yun. ⁵Ax aats, je Espíritu Santo kajxts aatse'e nnuja'vini jets je Nte'yam aatse'e xkatokimpaamp je'e kajx ku aatse'e je Jesucristo njaanchjáva. ⁶Ax ku tse'e n'ijtumda to'k muk je Cristo Jesús maat, ka'a tse'e vyinkopka ku ve'e nni'kxmimda nkojmimda je ixta'nun uk pan ka'a; juu' xa ve'e vinkopk, je'ets je'e ve'e jetse'e njaanchja'vimdat je Jesucristo jetse'e ve'em nuke'xnatáka tyánut je'e kajx ku ve'e je jayu ntsojkmumda.

⁷Oy xa miitse'e xpanajkx'ukvaandi je Nte'yam. ¿Pan tse'e tumtukmaso'okjada je tyuv je'e? ⁸Ka je Nte'yamap xa je'e ve'e, je'e juu' ve'e myaaxujjudu.

⁹Ve'em xa je'e ve'e je kyo'oy je'e juu' ve'e tyoondup ax jo'n je kats vya'añ: “Tyuktajkikujxpts je'e ve'e jyayuu'nama je levadura nujom je juts.” Jidu'um tse'e vya'añ. ¹⁰Ax vinjávats atse'e ntañ, je'e kajx ku atse'e to'k muk n'it je Maja Vintsán maat, jets kijpxe'e je vinma'yun njayejpumda. Je Nte'yam tse'e duyaktsaachpaa'tup je jáyuda juu' ve'e myakjomvinmaajjudup myaktivinmaajjudup, jyapana je'e.

¹¹Utsta ajchta utsta tsa'ada, pan kunjaa'kvaajña xa atse'e je jayu jetse'e je ixta'nun yakpaajmjadat jetse'e duni'kxmadat dukojmadat, ka'ats atse'e kuxjomtonda kuxtitonda je israeejlit jáyuda jets ka'a tse'e kuduko'oyjávada ku atse'e je jayu nvaajnjada pan ti ve'e kyu'oo'ki je Cristo jem cruz kajxm. ¹²Ax je'eda pan pan jatye'e mvinma'yunmooyjudup, ioy tse'e kuy'it jetse'e nujómam kuyakkustsojkkúx joma ve'e je ixta'nun yakpaajmjidi!

¹³Utsta ajchta utsta tsa'ada, je Nte'yam xa ve'e myaaxujjudu jetse'e naspaka m'ijttinit. Ax ka je'epts atse'e ntijp jets naspaka ve'e m'íttat jetse'e xyaktóndat je m'avintso vinma'yumda, je'e ve'e jetse'e mnapyutákajadat to'k jado'k je'e kajx ku ve'e ooy mtunnachókjada. ¹⁴Nvaate'e nujom je Moisés je pyava'nun yakvinmotumókut maat ya'a: “Tsokta je mmujantamda je mmutaktamda ve'em ax jo'n viinm mnachókjada.” Jidu'um tse'e yakvinmotumuk. ¹⁵Ax pan mtoondup tse'e ax jo'n je mu'uk tánuk juu' ve'e nacho'tsjudu

navyajtsjudup vimpit atuj,
 nay'íxjadats kux ku ve'e
 mnaajkvintókijadiat vimpit atuj.

**Je jayu je y'avintso vinma'yun
 jets je Espiritu Santo**

¹⁶Jidu'umts atse'e nva'añ:

Joojntykada ax jo'n je Espiritu Santo mtuknujávajada, ve'em tse'e xkayaktóndat je m'avintso vinma'yunda. ¹⁷Kux ku xa ve'e je jayu duyaktún je y'avintso vinma'yun, cho'oxpujkspts je'e ve'e je Espiritu Santo; ax je Espiritu Santo, cho'oxpujkspts je'e ve'e je jayu juu' ve'e je y'avintso vinma'yun duyaktoomp; ax ve'em tse'e ñacho'oxpákjada vimpit atuj. Je'e kajx tse'e ku ve'e xtonda juu' ve'e je Espiritu Santo chajkp, ka'a tse'e xyaktonda je m'avintso vinma'yunda. ¹⁸Ax pan je Espiritu Santo tse'e mtuk'íxjudup juu' ve'e je Nte'yam chajkp, ka'a tse'e m'itta jep je Moisés pyava'nun pa'tkup.

¹⁹Ixna ke'xna xa je'e ve'e pan pan jatye'e duyakoondup je y'avintso vinma'yun: ka'a tse'e d'vintsa'agada je navyajkun, tyukmaatjayeiptup tse'e je kats je yaa'y je ta'ax juu' ve'e ka púkap jyayeiptup, ka óyap ka va'ajtsap tse'e juu' ve'e tyoondup kyojstsup, ²⁰vyinja'vidup vyintsa'kidup tse'e juu' ve'e ka je Nte'yamap, pojktup, jot'aajnjjudup, ejkjjudup, ka'a tse'e juu' dukuvakta, namyájjidup, napyajkva'kxjudup, nay'apukupaajmjjudup, ²¹ñas'ayo'vidup tse'e juu', ooktup mookjudup, kañajxtup oknajxtup, axaa'kp tse'e juu' jaty d'utonda ku ve'e xaaj tyunju. Tyoondup tse'e

nujom juu' ve'e ve'em. Nnuujmidup xa ats miitse'e, ve'em ax jo'n ats miitse'e nvaajnjidi jo'n, jets je'e pan pan jatye'e ve'em játkidup, ka'a tse'e y'íttat jem je Nte'yam y'am kya'm.

²²Ax juu' tse'e je Espiritu Santo yakjéjip, ka'ats je'e ve'e vye'ema, je'ets je'e ve'e jetse'e je jayu je tsojkun dujayepta, je xoojntkun, je oy joot, juu' dumuténada, oy jayu ñapyámjada je viijnk jayu maat, je jayu duputákada, d'utonda ax jo'n dupaa'ty du'akeega, ²³je nuu'k aaj je nuu'k joot dujayepta, jetse'e ñay'akuvaa'najada. Ka'a xa ve'e ti pava'nun juu' ve'e dukayakajtp jetse'e ve'em yaktún. ²⁴Ax je'e pan pan jatye'e ijttup je Cristo je jyayu, ka'a tse'e duyaktonda je y'avintso vinma'yun, ve'em xa ve'e je y'avintso vinma'yunda y'it ax jo'n je jayu juu' ve'e aa'kani jem cruz kajxm. ²⁵Je Espiritu Santo tse'e xmo'yumdu je njoojntykinamda, ax ve'em tse'e d'utsak jetse'e nyo'yumdat je too' juu' je'e ve'e xtuk'íxumdup.

²⁶Ka'a xa ve'e nnamyaagujejxumjadiat, ka'a tse'e juu' jaty nto'numdat jetse'e n'íxumdat joma vaate'e je jayu juu' dukuvakta, ka'a tse'e n'ejkumjadiat ku ve'e nkajajejpumda juu' ve'e je viijnk jayu jyayeiptup.

Napyutákajada to'k jado'k

6 Utsta ajchta utsta tsa'ada, pan jem xa ve'e juu' ve'e jep tokin jaatp tukya'a, miits tse'eda pan pan jatye'e tam mnaajk'ijjtidinup je Espiritu Santo maat, mputákadap tse'e jetse'e y'ijtnuvat oy joot je

Nte'yam maat. Nu'u'k aaj nu'u'k
joot tse'e ve'em xtóndat jetse'e
ooy mtunnay'íxjadat vintso ve'e
mkaka'aduvat jep tokin jaatp.

²Napyutákajada pan ti ve'e to'k
jado'k jajtjup najxjup, ve'em tse'e
xkutyóndat je Cristo je pyava'nun.

³Pan pan xa ve'e maj nayja'vijup
óyame'e dukanupana, viinm tse'e
ñavyin'uu'nju. ⁴Kakje'e tse'e
xpayo'oydat vintso ve'e juu'
xtóndat xkótstat. Pan oy je'e ve'e
juu' ve'e mtoondup, jep xa ve'e
juu' kajxe'e mnatyukxoondukjadat,
ka'a xa ve'e vyinkopka jetse'e
xnatyukmu'a'ixmókajadat juu' ve'e
je viijnk jayu tyoondup kyojtstup.

⁵Kakje'e ve'e xtóndat juu' ve'e
mtukkadaakjudup.

⁶Pan pan xa ve'e yaktuk'ixp je oy
kats je oy ayook, tukkadaakjupts
je'e ve'e jetse'e duyakva'kxut maat je
yak'ixpajkpa nujom juu' jatye'e oy.

⁷Ka'a tse'e mnavyin'aa'njadat,
ka'a xa ve'e pan je Nte'yam
dukakatsapuk jetse'e
kyatukkuvétjut. Pan vintso ve'e
je jayu juu' tuduni'lip, ve'em tse'e
dutsíkut. ⁸Pan je jayu ve'e juu'
dutoomp kuxe'e dutsak jetse'e
dutónut je y'avintso vinma'yun, je
y'avintso vinma'yun kajxts je'e ve'e
vyintókinin je jayu; ax pan je jayu
tse'e juu' dutoomp kuxe'e dutsak
jetse'e dutónut je Espíritu Santo je
vyinma'yun, je Espíritu Santo kajxts
je'e ve'e dujayejpnit je joojntykin
juu' ve'e xa'ma kajx ijtp. ⁹Ax ve'em
tse'e, ka'a tse'e nnoo'kxumdat
jetse'e nto'numdat je y'oy je'e, kux
pan ka'a xa ve'e nton'atúvimda
je y'oy je'e, pyaatnupts je'e ve'e je
xaaj jetse'e mpajkumdat je y'oy je'e

juu' ve'e n'a'ixumdup. ¹⁰Je'e kajx
tse'e, vinxup naxe'e x'o'yixumjada,
ntooinjimdap tse'e anañujoma je
jayu je y'oy je'e, je'e ve'e vinkopk
je n'útsamda je n'ajchamda jets
je n'útsamda je ntsa'aamda je
jaanchja'vin kajx.

**Juu' ve'e je Pablo kyojtsjidu je
jaanchja'vivatajk jep Galacia**

¹¹Ixta vinxup je mújit letra
atse'e nja'a ku ats miitse'e
nnujáyada, nka'mam ats ya'a ve'e
nja'a. ¹²Je'e pan pan jatye'e
m'akee'yavaajjudup jetse'e
myakpaajmjadat je ixta'nun, je'e
kajxi tse'e ve'em dutonda jetse'e oy
ñaajktánjadat jeja je jayu vyinkujk,
ka'a tse'e dukuvakta pan ti ve'e
kyu'oo'ki je Cristo jem cruz kajxm,
kux ñuja'vidupe'e ku ve'e ve'em
yakkuvuk, yaktsaachpaa'tjadapts
je'e ve'e je jayu. ¹³Je'e pan pan
jatye'e dukuvajktup jetse'e je
ixta'nun yakpaajmjadat jetse'e
duni'kxmadat dukojmadat ax jo'n je
Moisés je pyava'nun vya'añ jo'n, ni
je'e tse'e dukakutyonda je Moisés
je pyava'nun, je'e ve'e chojktup
jetse'e je ixta'nun myakpaajmjadat
jetse'e ve'em dutukxoonduktat
ku ve'e m'akee'yajada jetse'e
myakpaajmjadat je ixta'nun. ¹⁴Ax
ats, je'e'yjits atse'e ntukxoojntkp
kuxe'e xku'oo'kimdi je nMaja
Vintsánamda Jesucristo jem cruz
kajxm. Kux tse'e jem y'uk'aa'k, je'e
kajx tse'e je naxviijnit je kyo'oy
je'e y'it ax jo'n kuy'aa'k yaja ats
nvinkujk, jets atse'e n'it ax jo'n
atse'e kun'aa'k jeja je naxviijnit je
kyo'oy je'e vyinkujk. ¹⁵Ni vinxupa
xa ve'e kyatún pan yakpaajmji

ve'e je jayu je ixta'nun uk pan ka'a.
 Juu' xa ve'e toomp, je'ets je'e ve'e
 ku ve'e je Nte'yam je jayu je nam
 joojntykin duma'a. ¹⁶Je Nte'yam
 tse'e dumoynup je oy joot jets je
 tukmo'tun nujom pan pan jatye'e
 joojntykidup ax jo'n atse'e tunva'añ,
 nujom pan pan jatye'e vyinkoon.

¹⁷Ax ve'em tse'e, ka'ats
 atse'e ntsak jetse'e ats je ntoo'

pan duyak'atókut, kux ya tay
 juu' jaty atse'e njajejpp yam
 nmi'kxm nkojm, ya'a tse'e
 duyaknuke'xnatajkip jets je Maja
 Vintsán Jesús atse'e nmutuump
 nmupujkp.

¹⁸Utsta ajchta utsta tsa'ada,
 je nMaja Vintsánamda
 Jesucristots miitse'e anañujoma
 mkunoo'kxjadap. Amén.